

Pa futuro docente di Wiskunde

Summer School ta un bon experiencia p'e participantenan orienta nan mes mihor



COMO estudiante na Universidad di Aruba y futuro docente di wiskunde, Rittley Ruiz a haya e oportunidad pa medio di su ex-docente di wiskunde na Colegio Arubano, esta Ricky Quant pa ta asistente di klas p'e curso di Wiskunde B durante di Summer School 2016.

Rittley Ruiz ta splica cu el a acerca Ricky Quant pa cu su stage relaciona e opleiding Leraar Wiskunde y e docente a dun'e e oportunidad pa duna les dilanti klas y asisti cu e lesnan pa

cu e Summer School cu a tuma lugar recientemente.

Loke ta wordo yama "Summer School" na Aruba ta diferente na loke ta custrumbra na paisnan manera Merca y Canada, unda cu e studentenan ta haya e oportunidad pa "haal in", ripiti of avansa mas rapido cu cierto materia.

Localmente, e Summer School, cual a caba di conclui su di tres temporada, ta un programa di dos siman pa graduadonan

di MAVO, kendenan ta integrando den HAVO 4 na Colegio Arubano of Colegio San Nicolas den e proximo aña escolar.

Durante di e dos simannan ta ofrece e alumnonan cierto vak y lesnan como un "sesion di orientacion" como preparacion y conscientisacion di loke ta spera nan n'e scolnan di HAVO/VWO.

E "overstap" ta hopi grandi y danki n'e cursonan e hobennan ta haya un

idea kico e materianan ta ensena, Rittley Ruiz a laga sa.

E estudiante ta mihor informa y ta consciente di e topiconan y terminologia cu lo wordo presenta na dje y ta reconoce nan den su lesnan, esaki ta facilita e transicion.

Ruiz a agrega cu e estudiante no ta wak e informacion manera ta Chines ta papia cun'e, pero sa kico ta wordo discuti y sa con e mester y por cuminsa train su habilidadnan den

e materia, den e caso aki Wiskunde B.

E estudiante tambe ta haya un "gevoel" con e lesnan ta wordo presenta y con e meneer ta duna les, Rittley Ruiz a conclui bisando.

E futuro leraar Wiskunde ta considera e Summer School no solamente un bon oportunidad p'e studentenan, pero tambe un excelente experiencia p'e mes cu ta preparando pa bay duna les na scolnan secundario den e proximo añanan.